

*Bou guia di arqueologonan drs. Raymundo Dijkhoff y drs. Harold Kelly*

# Bishitantenan a disfruta di exposicion den sala di Museo Arqueologico



*E salanan di exposicion permanente di MANA ta habri pa publico di diamars pa diabierna di 10'or di mainta pa 5'or di atardi y specialmente pa tur esunnan cu ta traha den siman, tambe riba diasabra y diadomingo di 10'or di mainta pa 2'or di atardi. Dialuna e sala di exposicion ta cera pa motibonan di mantencion y limpieza.*

ORANJESTAD - Diadomingo ultimo Museo Arqueologico Nacional Aruba (MANA) a ofrece publico e oportunidad pa haya un guia den su salanan di exposicion permanente nobo door di arqueologonan

drs. Raymundo Dijkhoff y drs. Harold Kelly. Riba e mainta aki 178 persona hopi enthousiasma, di cual 172 persona tabata local, a haci uso di e oportunidad aki y a haya un guia completamente

gratis di nos expertonan riba e tereno di arqueologia.

Pahopidiebishitantenatabata e prome biaha cu nan a bin Museo na su ubicacion nobo y nan tabata hopi sorprendi di e nivel halto di e exposicion y e tecnologia moderno cu a ser usa pa trece e informacion cerca e bishitantenan.

E bishitantenan tabata hopi

varia, tanto hoben como adulto y hasta famianan henter a bin pasa un rato agradabel y educativo na Museo. Hopi a haci uso di e oportunidad pa haci preguntanan cu semper nan tabata kier a haya un contesta experto riba dje y alavez a ripara cu e guia mes tambe a spierta e curiosidad di e bishitantenan pa ainda haya sa mas di e historia di nos

antepasadonan.

E actividad di Museo aki tabata hopi exitoso. Ya a haya peticion pa ripiti esaki y Museo Arqueologico Nacional Aruba lo ofrece publico sigur un biaha mas e oportunidad pa haya un guia di nos arqueologonan. Di e potrenan adhunto por haya un impresion di e actividad aki.